

大清仁宗睿皇帝實錄

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之六十九

監修總裁官經筵講起居注官太子太傅武英殿大學士文淵閣領事稽察欽奉 上諭事件處管理工部事務翰林院掌院學士隨帶

加二級尋常加四級 臣曹振鏞總裁官李太保文淵閣大學士管理刑部事務加五級 臣戴均元經筵日講起居注官太子太保內大臣文淵閣提舉閣

事務稽察欽奉 上諭事件處協辦大學士戶部尚書翰林院掌院學士教習庶吉士總管內務府大臣鑲黃旗滿洲都統步軍統領管理戶部

三庫奉宸苑清漪園等處總理工程處御膳房御樂房太醫院西洋堂事務軍功加三級隨帶加二級尋常加三級紀錄二十次 臣英和

經筵講官太子太保禮部尚書上書房行走武英殿總裁管理國子監事務加六級隨帶加三級紀錄四次 臣汪廷珍等奉

敕修

嘉慶五年庚申六月壬子朔諭軍機大臣等

祖之望等奏。審明已獲匪苗。分別首從辦理。一摺。已交刑部覈擬具奏矣。至摺內稱此案在事出力文武員弁。另行確查會奏。而詳閱供單。則首犯吳流紀等。係被苗弁擒獻。何以摺內未據敘及。該苗弁等既將匪犯擒拏。自應加之獎賞。豈有專將出力文武員弁查奏。而轉遺苗弁之理。所辦未免疎漏。著祖之望等查明此次擒獻匪苗之苗弁。係何姓名。係何職銜。並查從前獎賞出力苗弁如何加恩。

及現在應如何酌賞翎頂之處一併具奏並著曉諭該苗弁以伊等能擒獻匪苗現今奏聞蒙大皇帝深為嘉許已令該撫查明加恩此後如有似此滋事匪苗該苗弁等即當自行管束隨時查拏稟究自必仰邀恩賞儻徇庇不辦以致苗匪復有焚搶不法之事亦必將該苗弁等治罪如此明白宣諭俾其知感知懼認真彈壓庶可期苗疆永靖○癸丑諭內閣台布奏緊遏西竄賊匪設法解散裹脅

一摺戴家營賊匪前經官兵勦殺分股由黑河竄甘據台布奏係由索費英阿汛地逸出除將索費英阿革職交額勒登保查訊外至台布彼時在陝境西面往來彈壓未能督率將弁嚴為勦截咎實難辭而摺內並未自行請罪且辦理糧餉最關緊要今於經畧額勒登保大營在袁家莊勦賊竟至糧運缺乏所辦何事本應將伊革職發往伊犁惟念台布在陝經年甫知頭緒一時乏人更換是以姑

奉從寬貸。台布著革去翎頂。仍交部嚴加議處。
以觀後效。至長麟前經額勒登保知會。在陝
省東面帶兵防堵。而本日額勒登保。台布奏
摺內並未聲敘長麟在何處堵截。且伊係本
省總督。索費英阿。不能將戴家營賊匪攔截。
至今由黑河奔竄。皆由長麟派委非人所致。
亦應革職治罪。姑念長麟所駐之處。距黑河
稍遠。較之台布之近在西面。未能堵截者。尚
屬有閒。長麟著拔去花翎。仍交部嚴加議處。

以示薄懲。長麟台布。惟當倍加愧勉。於堵勦糧運事宜。認真籌辦。以期稍贖前愆。儻再有貽誤。必將伊二人從重治罪。不能再為曲宥也。○以四川軍標中軍副將馬瑜為貴州安

義鎮總兵官。○甲寅。諭內閣。上年九月

皇考高宗純皇帝升祔後。朕於孟冬時享。歲暮

祫祭。恭詣

太廟行禮。而

奉先殿尚未經特祭。恭讀

皇考御製詩集。註內詳載。乾隆戊戌年。因奉令
孝聖憲皇后升祔。後未經

親祭

奉先殿。特於是年孟秋之朔。

親詣致祭。而孟秋時享。

太廟循例。

遣王恭代。朕思中元為祭祀之辰。朕本擬恭詣

裕陵致祭。因查乾隆二年。

皇考曾經降旨。以秋令正值禾黍暢茂。恐致扈

從人馬踐踏。是以未經前詣泰陵。朕自當敬守前謨。不敢過禮。至奉先殿致祭。則有

皇考成例。所當做法遵行。今朕特於中元恭詣奉先殿前殿讀祝致祭。以申誠敬。所有應行典禮。著各該衙門照例敬謹豫備。俟

奉先殿祭畢。再恭詣壽皇殿拈香行禮。其孟秋時享。

太廟仍照例遣王恭代○又諭托津奏接奉令
伊回京諭旨伊遂起程前來等語托津係特
派管理軍需之員今回京時自應將伊所管
營內現存銀幾萬兩約數幾月之用奏明即
目下所餘無幾尚需調撥銀幾萬兩備用亦
應奏明至德楞泰軍營距托津所駐達州甚
近其軍營要緊情形托津亦應遇便奏聞今
托津並無一語奏及僅含糊稱將檔籍及現
存銀兩均交勒保派出道員收領其現在究

存銀若干之處。並未聲明。實屬糊塗之至。似此無用之人。即使來京。又令其辦理何事。托津著革去副都統。加恩賞給頭等侍衛。前往葉爾羌更換奇豐額回京。○刑科給事中廣泰奏。臣巡視南漕。每聞綠營弁兵升拔千把。竟有視為畏途者。緣各營千把缺出。係由本營將官層層遴選保送。各該鎮酌擬二三人。送提督考驗。再送總督拔補。往返數千里。守候動經數月。陪選之人。苦累尤甚。乾隆五十

六年。前任江南提督陳杰。曾奏請分別督提。駐劄遠近。就近拔補。經兩廣督臣福康安議駁。並將向來不由總督考拔各營一體改歸總督拔補。窮弁畏賠累之苦。營務亦難免曠誤。請嗣後千把缺出。督提本標聽自行考拔。其鎮協各外營。各視督提。駐劄遠近。由該鎮徑送就近一處拔補。至外委職分愈小。各視提鎮。駐劄道里。就近考拔。以省跋涉。得旨。所奏甚是。兵部議奏。尋議。嗣後外委缺出。各按

督提鎮駐劄營分。分別就近考拔。其提鎮拔補之弁。仍詳明總督咨部註冊。至把總由該鎮轉送督提考拔。於體恤末弁。尚未周備。應照考拔外委之例一體就近改歸本標拔補。千總一經拔補。即可膺將備之選。向來俸滿保送。均令送部引見。自應分別歸於總督提督考拔。以昭慎重。其撫標千總。仍歸巡撫拔補從之。○調正紅旗漢軍副都統西成。為正紅旗滿洲副都統。以理藩院右侍郎貢楚克

扎布兼正紅旗漢軍副都統○乙卯諭內閣
休致道員劉錫嘏援引空叅人員引見之例
在部具呈經吏部議駁請旨劉錫嘏與胡齊
崙俱係景安叅奏胡齊崙業經審明正法劉
錫嘏雖無實在劣蹟其平日官聲平常朕亦
素所稔知前此景安所叅並非屈抑是以上
年秋間查辦接駕人員劉錫嘏未經酌加錄
用乃伊妄生冀倖又向吏部具呈實屬不安
本分劉錫嘏前已勒令休致著即行回籍永

不敘用。若再敢多事。必當治以應得之罪。決
不寬貸。○又諭太常寺奏。請將現任筆帖式
明福補授滿典簿一摺。向來內外各衙門歸
選之缺。例應由部銓授。不准奏請升補。今太
常寺滿典簿既係選缺。而德明等率以筆帖
式明福奏補。實屬違例。若云該衙門事務必
須熟諳之員。方能辦理妥協。是凡有部選推
升之缺。皆應將本衙門人員升授。而各部院
亦俱紛紛奏留本部之員。吏部選法竟可置

之不用。成何事體。此非朕偏重吏部事權。況此時誰敢擅權。實因於銓政有礙也。且德明等。以由吏部推升太常寺司員。俱係人地生疎。不能辦事。若太常寺人員推升別衙門。寧獨非人地生疎。將遏抑不令升轉乎。況乾隆五十六年。曾經吏部議奏。各衙門如有應歸部選之缺。不准違例奏請升補。若不按定例。將該堂官交部議處。例意甚為明晰。德明等尚為此奏。殊屬非是。著交部覈議具奏。○又

諭。本日召見新授廣西思恩府知府金之忠。新選湖北宜昌府知府盧溶。朕察看二人才具。金之忠雖捐納出身。但在直隸山東歷任有年。且曾任濟南首府。辦理公務。自能熟諳。思恩府僅止四屬。廣西現又無事。員缺尚非緊要。至湖北荆宜一帶。竄匪尚未勦淨。宜昌府係選缺。但該處現有團練鄉勇。督率堵守之事。且該府所屬共有七州縣。事務亦繁。盧溶係捐納出身。初登仕版。不足以資經理。所